

說

庫

北

庫

塵餘

荆軻客

清 金壇曹宗璠汝珍著

荆軻客軹深井里人。欲死國埋名。故史不著其名。學劍慕聶政之爲人也。游大梁。爲夷門侯嬴御。如姬既已竊兵符授公子。救趙恐晉鄙宿將專閫。見公子輕車來代。心狐疑。再請事敗。侯生令客袖鐵椎。鉞殺晉鄙。客謝曰。吾所取者秦王耳。胡嗟惜爲見朱亥。退游于衛。荆軻兄事客。弟蓄高漸離。軻與魯勾踐爭博道。勾踐目攝之。客從旁躡荆軻足。默不應。俱遁去。遂游燕。荆軻漸離酒酣和歌。燕市井中已而相泣。旁若無人。客引軻至僻處曰。慧掃尾箕。望氣來高丈餘。前赤而印。聽都邑人民之聲。律中商。馬鳴悲。皆兵兆。渤海之間。復爲長平也。軻曰。天道元遠。吾倦游。悲歌慷慨。敢于急人。惟燕趙士耳。新從邯鄲來。不忍去也。客辭謁蒼海君。目曰。即有急車折轅馬蹶蹄。集響至燕。太子丹不量力。欲報馬烏之恥。因田光先生跪請。荆軻堪刺秦王。荆軻許諾。美人供帳。惟恐不得當也。軻遣高漸離之東海。召客未返。秦師壓燕境。事急。太子丹具駕軻叱曰。往而不返者豎子也。少留待吾客與俱。今太子急裝。豈疑軻畏強秦哉。遂

去不顧。荆軻提匕首劫秦王。不幸中銅柱。火燃。秦人誅荆軻。而客之易水。上太子丹與賓客白衣冠。祖道處。高漸離擊筑。客起舞劍。泣下數行。歌曰。壯士怒。兮入秦關。匕首摘兮驚龍顏。鉞交胸兮袖胡絕。白虹雌兮仇未雪。誰報太子兮徵聲竭。長平髑髏兮飲血泣。又歌曰。東連三晉兮構強胡。齊楚蠹起兮策可圖。曠日持久兮不能竣。四海縞素兮倚鋌鋸。與漸離兮背別去。及始皇滅韓。張良破家報仇。從蒼海君偕客號力士。客語良曰。自高漸離死。筑。始皇不近諸侯。客無可為者。今離穴遠游。可取而代也。遂與良祖擊。始皇博浪沙中。誤中副車。客歎曰。始皇有天命。誰謂荆卿劍術疎哉。始皇大索。客避地吳中。依項羽。楚漢兵起。張良事漢。客事項王。號蒲將軍。與黥布。季布以少擊衆。常摧鋒冠軍。項羽威震天下。名聞諸侯。皆三人籠戰力也。客業從項王。救趙。降章邯。夜坑殺秦卒二十萬於新安。入關。焚咸陽宮室。手斬降王子嬰。持其頭祭荆軻墓曰。吾可以報荆軻之志矣。項王欲割琅邪郡封客。客謝曰。秦暴虐無道。故從大王率天下諸侯滅秦。今政由己出。封賞不均。漢王失職。陳餘怏怏。諸田亦未有所樹。而多王羣臣。諸將善地。是動天下之兵也。不忍見父老子弟。再罹鋒鏑。且臣與荆軻刺秦王。義不獨生。以秦未滅。故烏視禽息。今臣事畢。願從荆軻九原之游。乃自刎。

荆軻塚像。後田橫之客聞之。五百人咸伏劍殉也。所謂畢命達志義俠者乎。張良請漢王令有司歲以太牢祀也。

贊曰。禍亂之起。豈可測哉。銅柱空燃。副車漫震。始皇自以天命在我。孰知其與滿鮑魚國墮璽。易竟在肘腋中。軍令也。始皇坑趙卒四十萬。故殺扶蘇。弑胡亥。乃出趙氏公族。朔風蕭蕭。易水不寒矣。若客者。竭來何暮。無補劍術。以行道遲遲。訴巫咸。不甚可悲乎。

翟公客

羅雀可。曲逆人。一曰無終人。廷尉翟公客也。翟公鼎貴時。雀可造請門下。不避風雨。每召客。酒酣起舞。為沐猴與狗鬪。侍喪以先往。後罷為助。兒女子耳語。日常移晷。夜視漏刻。惟恐金吾之警行也。翟公持刑平。行于定國。廉不如。然所得貲財盡以奉士。車馬輻輳。擊鮮極歡。非投客車轄。不關門。門開常竟夕。而妻子自養。案上不過三桮。時張廷尉客王生。衆中命廷尉結襪。倨于廷尉。邑子不才。不敢見賢郡將。惟雀可溫雅。有蘊藉。名噪公卿間。頗招權僱金錢。翟公客雖多。惟雀可最後。翟公官罷失勢。財緣手盡。賓客益衰。庭中露草蒙茸。門盡開。鳥雀乳于晒翼。可設羅焉。翟公令人招雀可。

則已入公孫丞相府。脫粟飯布被。一日崔可車過巷。崔公老奴攬轡。崔可叱馭曰。驅之。武安侯燕不敢後也。明日始謁崔公。崔公曰。君之體肥矣。崔可欠申于子曰。羣兒自相貴。勞長者秉燭夜游。露晞。為侍婢扶卧。常失日。崔公奉卮酒曰。君貴人也。畢之。崔可半膝席曰。中聖人不能滿觴。歌驪駒別去。崔公心恨。欲聲其罪。鑄刑書往訴梁內史韓安國。投牒安國曰。朝盈暮虛。市道固也。曩田甲溺吾死灰。灰復燃。肉袒謝。吾笑曰。公等足與治乎。卒善待之。曷往謁中大夫主父偃。崔公往訴中大夫。投牒偃曰。始吾貧時。賓客不我內門。後吾相齊。客亦無復入偃之門。公長與諸君絕可矣。曷往訴北平太守李廣。崔公往訴北平太守。投牒廣曰。嗟乎。崔公天子之廷尉也。不愛金帛酒醴。以交崔可。崔可無大功。可以稱者。今一旦失勢。掉臂去。是深負崔公也。夫賢者破家養士。而卒不得士之報。亦何以厲天下之節哉。向霸陵尉呵止。故將軍吾斬之。吾何惜三尺劍。刺負心人腹中。為崔公報仇。急遣符追崔可。崔可惶懼。念列侯。惟魏其賢。且與李將軍俱戰吳壁下。相善。遂齎千金。叩頭求哀。魏其取金陳廊廡下。諸名士過。輒令裁取為用。發書求解。灌將軍夫直入曰。君侯何恃也。互引繩排根。生平慕之後棄者。豈非為賓客負人哉。崔可實應首誅。願溺其冠。唾其面。遂坐堂上。崔可

膝行伏地。灌將軍目眦盡張。髮上冲冠。怒罵之極。詆其生平。不值一錢。崔可掩面狂走十餘里。遇鄭當時。觸車輪仆。僵當時下車扶起之。問故。崔可淚下。承睫內氣煩冤。曰。奴即負心。賢豪長者。同聲伐予。敢請罪。果何當。當時賜之坐。俟喘息稍定。乃喟然歎曰。道喪交。交喪世。非一朝夕之積也。美哉優優乎。韓內史柔不吐剛。不茹君子也。然太怒無崖。介哉鏗鏘乎。人之無良。投畀豺虎。然偃賤新貴。絕人足自發舒。若翟公既淪落。吾深愛其昔之情深也。一麾豈足酬寵哉。猛哉飛將軍。奉辭討罪。是謂俠烈。其猶有朱家郭解之風乎。然負心人實多。安得匕首遍刺之。吾懼其既也。美哉醜而曲暢。誅而不虐。斷頭穴胸。不如撫心自疚。抱愧欲死。其在灌將軍之怒罵乎。其在灌將軍之怒罵乎。於是崔可面無人色。匍匐而歸。終身不敢見翟公也。

秦龍氏

贊曰。蕭朱結綬。王貢彈冠。史策以為美談。繼其道者誰歟。世人輒以張耳陳餘為解。曰。賢者不免。夫張陳命爭呼吸。位異侯王。以懟憤凶終。賢者猶鄙之。矧今所爭不過毫釐。輒掉頭不顧。且投石焉。何哉。此古人抱石沉河。不願長視於世也。

夏后孔甲。有二龍降於廷。枝角長髯。巨鱗燭絕。睛火奔電。尾雨搖雲。踉蹌斗鼻。仰首

求食。孔甲執禮烹駒。廷揖之言語不通。精色莫授。孔甲慨然曰。時乘六龍。今遂無其人乎。撓鱗氏進而對曰。龍之爲物。神與化孳。潛躍在淵。飛見在天。亢陽則變。乾動坤旋。今離其天淵之位。失其雲雨之勢。困處廷楮。母乃君德之不建。故有鱗蟲之孽。君其放之河濟。而恭默乎黼辰之先。孔甲怒。執劍從之。猶龍氏曰。君毋怒。撓鱗言。殺諫臣不祥。臣聞典故有擾龍氏。秦龍氏。君盍召二臣而問之。於是擾龍氏進而對曰。龍有性有情。古者龍遂其性。嗜欲不形。大海洋洋。吐納百靈。風雨以時。禾黍用成。其有時水政而無龍師。龍之與人居也。其在中古乎。吾祖父實世其官。潔其水源。時其動靜。飢則授以魚鱉。怒則鎮以鑕鐵。雖導其情而無敢逆其性。每雷雨作。鼓鬣飛去者九之五。用是去來不常。而吾沼中時有蜆骨焉。秦龍氏進而對曰。擾龍之術工矣。猶未盡其巧也。夫龍得其情而性可操也。臣與龍同起居。文身斷髮。行卧蓬蓬。臣能使龍飽。豹胎象炙。和以魚膾之餌。臣能使龍飢。橘皮芍藥。襍以枳木之蘊。臣能使龍喜。雌蛟牝馬。暖日浴波而騰蹕。臣能使龍怒。雞羽氣血。悲風鼓浪而騷除。屈伸聽臣而偃蹇。涎唾惟臣之割取。使其同類曾不得同川而煦沫。又况鱗蛭之儔。能進讒而呪詛。於是龍一日失臣。則涕泗連連。心煩意冤。雷雨不敢激。風雲不敢隨。渙其江漢。

之都居。而惟吾刀俎之宰屠。究其所以失飛騰之靈性。惟嗜欲見端。遂一往而不可圖也。於是孔甲大悅。畜二龍於沼。泰龍氏醢而進焉。孔甲食之美。復求龍炙。泰龍氏懼。逃之大澤。龍皆遠徙。翱翔而不肯下。居歲餘。雷聲殷殷。有神人仗劍宣策曰。久矣。夫龍之為盛德也。餐惟沆瀣。飲惟甘露。膚寸雲合。滂沱千里。上帝所駕。烝黎所仰。禍在奸人。誘設馨香。貪餌迷性。竭澤屯膏。遂使海沸波騰。郊原赤旱。百神怨恫。殛死無赦。是日泰龍氏子孫。盡為雷火焦腐。於是泰龍氏術不傳。而龍種乃復神靈於天下。猶龍氏退而語人曰。嗟乎。龍惟乘雲御空。故為貴耳。營情飲食。乃蚯蚓之弗若。賈生有言曰。使麒麟可繫而游兮。曾何異乎犬羊。彼龍亦惕然自省也哉。

贊曰。吾聞孫思邈得龍宮醫方。則龍之飲食嗜欲。當與人同。古之世。龍與人狎居。以水政修。而人能其官也。然亦褻矣。語曰。白龍魚服。既魚服矣。焉能禁人之不網罟也。然陸機張華皆曠世逸才。酒沃龍胙。報以戮死。則龍豈可胙乎哉。易曰。雲從龍。又曰。龍戰於野。有從無戰。其在亨利之際乎。

獄吏貴

漢承秦弊。刑罰煩僇。俗吏虎而冠。武帝更摩牙而厲之。內有掖庭詔獄。入者輒糜爛

以死外有廷尉獄又多設司奸校尉伺察幽隱投鉅公卿兼以巡方糾覈防其復振必宿陷牢中遠郡惡少年受當途旨蜚誣故侯以報宿怨於是章滿公車人滿北軍縉紳惴惴慮無不可旦暮入獄矣民間為之謠曰牢耶獄耶百官圖耶印何累累綬若若耶囚室踊貴逾長安市價吏務鷹擊毛鷲為治間有平反吏宰相輒駁覆或并械繫夫殺人以為功人猶為之殺人以避禍雖賢者不免醫過厲門不同簋食恐其累己也每奏讞罪臣撫心呼冤吏曰無益吾不惜以身為殉徒兩敗且益重君累君幸獨坐命矣夫罪臣飲泣無以應深文微辭律加數等久之習為固常仍駁覆又復加等歲月淹滯穢毒薰蒸多有耐罪以上而尸僵囹圄遠魂不歸孤子破家迎喪萬里每一案結鬼薪白粲則囚伍瀝酒以賀曰免荷戈萬里行也謫戍則叩頭臯陶廟前曰得生過里門也宣帝在民間知苦吏急然亦尚綜覈地節黃龍時四方無虞單于來朝頗修神祠集方士蓋意在縹城三神山之間偶讀高帝紀至叔孫通定朝儀曰乃今知皇帝之貴也宣帝曰神仙貴耳于定國曰今時惟獄吏貴耳帝默然久之曰漢治雜霸莠盛苗穢何可不鋤今刑政肅清下無冤民而廷尉詭辭獄重刺譏朝廷豈直反唇腹誅有說則可無說則死定國免冠頓首謝曰此非臣之言絳侯周勃言

也。勃身與項王力戰，芟除呂難，手授璽繫文帝肘下，以單辭下獄。饋獄吏千金，出語人曰：「吾嘗將百萬軍，不知獄吏之貴也。」雖然，絳侯猶功臣，非社稷臣。蕭相國何撫循三秦，轉餉千里，收圖書，定律令，功在第一，帶礪河山。一旦下獄，則頭搶地，訥不能出聲。雖然，蕭相國功高，猶人臣耳。陛下為皇曾孫，時居郡獄，却非賴宗廟之靈，丙吉之忠，死拒使者，命夜閉門，則是太山大石橫自立，而上林柳葉虫空食字也。曷能子元元，臨萬國，為中興首哉？於是宣帝感慨淒愴，惻怛於心，下詔曰：「昔有虞氏畫衣冠，異章服，而民不犯。今中都官歲斷獄以萬計，而貴人之牢，魚鱗蝟毛，有一部縉紳之謠，非所以養賢士尊朝廷也。股肱心膂，誼易隆焉。猜禍吏義縱、王溫舒等，子孫已被誅戮外，永錮則列不士流。中璫恭顯巧偽深賊，睚眦中傷，天下重足一跡。其徙歸故郡。丞相公孫賀逐捕大使朱光世，以坐論之職，躬親搏擊之誅，蒼鷹乳虎，甘為魁宿，傷和陰陽，變逆天地，其盤水加劍以殉，與天下更始焉。由是疏幽滯，釋沉枉，舉廢格，韓安國、徒步也，起為御史大夫；張敖亡命也，起為京兆尹；黃霸、長繫也，起為丞相；蕭望之、對簿也，起為太傅；破觚而為圓，斲雕而為樸，網漏吞舟之魚，吏治蒸蒸，復覩文景之化焉。」

贊曰。路溫舒曰。治獄之吏。皆欲人死。非憎人也。治安之道。在人之死。如是吏安得不酷。亞夫之功。楊惲之才。京房之術。皆不能逃死于獄。寃乎哉。寃乎哉。微直為長我王國也。高大其閭。掃除其墓。獄吏聞之。亦知警乎哉。

梁疊樽

自古將相權勢之家。曷嘗不寶珠玉鼎彝。為子孫之鎮者乎。然貧者不能有。有者不能守。即能守矣。不過一二傳。為新貴攫去。且更得奇禍焉。懷璧之為罪也。豈獨匹夫哉。昔梁孝王。景皇帝幼弟。有平吳功。建天子旌旗。出警入蹕。連城數十。兔園亭館。臺池窈窕三百里。游士垂橐。妖女騁乘。庫內黃金四十萬斤。他物稱是。可以守寶器者。莫孝王若矣。孝王寶一疊樽。趙璧發耀。鍾瑛澄輝。鏤畫之巧。龍翔鳳戛。孝王戒李太后曰。他物雖千萬可與人。此樽不可與也。後孝王子任后開庫。直取去。李太后欲對漢使奏其狀。閹門咋指。竟日啼。不得與漢使語。事聞。王坐不孝國除。樽入內帑。王舉睢陽而棄之。何有一樽也。昭帝時。娶霍光甥女為后。后以樽賜父上官桀。時有充華侍側。年且老。曰。樽不可賜也。昔先帝封禪。羣臣上頌。敬舉此樽。呼韓來朝。稽顙甘泉。再舉此樽。今以賜桀。恐桀德薄。不足以當之。后不聽。光夫人顯從桀家見樽。欲得之。

桀妻以后財不敢予。桀曰：予之吾且弋光之家，何愛焉？遂糜之狗，寧顧兔耶？光死，樽將焉往？猶外庫焉。歲餘，光先誅。桀樽遂為霍氏有。顯愛監奴馮子都，用樽為合歡之卮，乘五彩輿，淫酣第中。霍氏敗，樽復歸內帑。時充華尚及見之，曰：吾固知上霍之德不長。願官家齋戒，神明祀天，享神毋為淫褻用也。哀帝復以樽寵董賢。王莽力爭，帝曰：吾欲法堯禪舜，君豈爭天下？毋爭樽。賢死，樽歸莽。莽語其子宇曰：疊樽之禍人久矣。惟余功德高，符瑞駢臻，四夷仰沫，克享帝心，宜有此樽。遂觴於祖廟，令良工刻其旁曰：新都溫柔鄉。莽居攝，益慕古制，遂取高祖斬蛇劍，位司馬，封毓黃侯曰：赤精子。火生土也。取武帝汾陰鼎，位秩宗，封氲黃侯曰：黃雲氲氲，北土象也。取傳國璽，位冢宰，封鎮黃侯曰：秦水德，惟土尅也。并疊樽為四位。司徒封液黃侯曰：酒養脾，滋土膏也。莽以土德王，故皆稱黃。云鑄印佩綬，執金吾捧以自隨。後翟義兵起，莽憂懼，不知所為。疑漢家寶物為祟，遂埋斬妖劍於玉門關外。曰：邊遠謫戍，汾陰鼎折一足，尚饒。曰：鬼薪白粲，疊樽漏不可盛漿。曰：冠帶閒住，為傳國璽為孝元太后擲地損一角。且秦時物，符璽郎猶用之。曰：革職為民當差，蓋用以相壓勝云。四寶在莽世已不能守，況漸臺火起，玉石俱盡，時乎人壽不滿百年，自少至老，與化俱徂，形骸且為異物，乃

問殉舍之器哉。完毀數也。去來時也得者矜之。以為榮。失者慙然。以為恨。悲夫。贊曰。珠玉穢矣。若鍾繇之筆法。桓元之書畫。奇章之石。贊皇之草木。皆雅人韻事。然轉盼之間。已為陳迹。雲影漾目。鳥聲娛耳。而必欲據以為己有。架蜃市之樓臺。植空華之枝葉。腐鼠固不足以嚇鵩雛也。

弋視數

有客鍛羽倦游。琴樽寄傲。求養生之術。傳放子之書。曰。隱如是足矣。一日讀史。至梅福棄妻子。變姓名。游會稽。為吳門卒。乃廢書而歎也。何居乎。妻子為網羅。姓名為鉞刃。豈真得已哉。夫士當入朝建論時。賢賢奸奸。目光如電。其為射的固宜。若夫釣鮮採綠。身世兩棄。吾方以為義黃上。而忌者猶以為檻中物也。其禍豈可測哉。故賢者隱文埋名。至死不見。倘影響流傳。及污頸血矣。是真不可赦乎。或曰。人才有屈伸。天道有往復。時雖螫藏。其人尚在一朝攝柄。龍飛豹變。故痛斷根株。聊以固吾圉也。或曰。怨毒之於人甚矣哉。故呂后裂眦于人彘。武安蜚語于魏其。雖途困勢窮。而報必過當。取快俠腸。遂負慚義憤。有弗惜也。或曰。秋氣肅殺。實闢天運。故嚴霜先屑於喬林。裂風必墮乎危石。正類前凋。黔首鼎沸。命也。於小人何尤焉。或曰。名壽不可兼得。

義利必至相仇。故利器發硎於盤錯。下玉泣血於刀鋸。質碎廷階。馨留青史。造物固欲成是人也。或曰。山林之人。感憤悽愴。既與以著述之暇。復恣其嫺嘲之態。故王允甘心於蔡邕。禰衡隕身於黃祖。使漢史不作。鼓搥無聲。為身後計。勞且遠也。持諸說而問之當途之人。然耶否耶。昔司馬相如有云。焦朋已翔於寥廓。而羅者猶視乎藪澤。夫藪澤固鴻雁之死地也。若士大夫之藪澤。乃寥廓之外矣。弋者彎勁弓。而施新繳焉。將何所逃死哉。世之治也。雖陸沉金馬門可也。朝之戰也。泌水洋洋。皆元黃血也。客採藥游會稽。求梅福故里。草長雲迷。不知其蹤。歧路囂襍。莫辨西東。坐而假寐。夢一羽士。蹁躚揮麈曰。子訪梅福之居乎。環會稽皆山也。長松合抱。流水潺潺。子絕賓客。碎筆硯。焚詩書。採薇煮蕨。蒲團夜坐。當有梅福往來其間。唐人云。只在此山中。雲深不知處。避秦人仍在桃源耳。客曰。賤子愚昧。敢問子將高標月旦。阮籍不置臧否。夫否否。實應受筆舌之禍。若夫臧臧。善氣之迎人也。曷為招尤哉。羽士曰。天下善人少。而不善人多。子與善人游。不善人皆欲殺之矣。客憮然起曰。先生其梅生耶。何言之切也。世傳生仙去。敢問服食之術。羽士曰。坎飛朱雀。離麗流珠。金華先倡。鉛粉同居。鎮歸厚土。戊己為廬。寂寂守夜晦。晶晶滿太虛。彈無懷之絃。而乘混沌之車。客

乃儼然止。贊然立。心與天游。貌人而蟄。巧專于削鑿。神凝于蜩翼。又何難嬰兒衛子。海鷗趙石。於是醒而為之記曰。余今而可以免弋者之慕也已。

贊曰。昔父老弔龔生。薰以香。自燒膏以明。自煎然。則薰可變為茅。膏可化為石歟。值香於幽。藏光於晦。其有物物而不物于物者耶。內視元牝。頤養谷神。超超塵外矣。然叔夜凝神。終傷韻雋。子瞻學道。猶恨才奇。習氣難除。刀鋒海瘡。亦戒心也。夫

驚伯有

或問于客曰。鬼信無乎。伯有何以稱焉。客曰。無無有有。或曰。何謂也。客曰。混沌之前。有鬼乎。或曰。混沌氤氲。誰為構精。未有人焉。有鬼。客曰。混沌之時。陰陽未搏。太極包裏寂靜虛明。佛擬之為覺。老擬之為元。儒擬之為性。為良知。皆在形似之間。此人之由生也。抱純一。寓陰陽。動靜云為。各歸其根。至於氣散神升。而我與天統歸太極。又安得於其中分孰為天之靈。我之靈乎。乾坤總是法身。五行妄為別相。此之謂公我。此之謂無我。我且無矣。奚有我。靈之影現乎。惟夫識情未滅。繫着纏綿。因而游魂為變。凡鬼皆魂之游而未歸者也。莫然無魂。乃與道俱。彼之為神靈血食者。其亡子之弱喪而無家者耶。不亦勞耶。故覺者歸之路也。識者生之役也。生為識所縛。死為識

所留取精多而用物宏。魂魄能無滯歟。故夫伯有強厲之魂也。申生之妖夢。黃熊之索祀。怨憤之魂也。叔帶持腰而泣。君子立社而謀。喪敗之魂也。彭生立豕而墮屨。如意為狗而搢腋。冤報之魂也。又若忠臣怒濤。孝婦赤旱。又若輔嗣談易。叔夜揮絃。師延譜濮水之音。王勃吟落霞之句。皆英雋絕羣。齋志長沒。金石不毀。音響如存。又若變宰罔象。方皇委蛇。興雲灑露。獻瑞呈符。鬼類衆夥。不可殫記。湛寂海中。分一勺圓。明鏡裏。逗餘光。當其情斷想空。則烟銷泡滅。故有鬼乃識波之相。纖無魂斯智照之圓。明生從何來。死從何往。一太極而已矣。或曰。蛻形歸虛。達人了悟。乃書傳所載。召帝廷而剪土。夢曹參而孕子。豈彼聖賢未安寂靜。猶有往來歟。客曰。至人滅迹而存神。凡夫見燭而取影。目青忽覩狂華。青紅殊色。鼻觀偶調氣息。黑白分形。苟業緣之欲感。遂象罔之若來。想由己作。體絕彼生。斯大千同往于覺中。而下學不隔于靈路也。故蛤端佛像。鱗誦經聲。盡萬類以含宏。而如如不動。包三界以出入。而寂寂常依法位。常存性本。無生鬼之有無。可無容置喙矣。

贊曰。或問吾師。惟彼悞人。死歸太虛。愚夫魂散。淒風苦雨。借問二空。作何分別。吾師曰。咄。虛空止。一不應有。二誰見。淒風誰見。苦雨若有見者。即隨風雨。惟其無見。故住。